

125

DEO OPTIMO MAX.
UNI ET TRINO,

VIRGINI DEI PARÆ ET S. LUÆ,

Orthodoxorum Medicorum Patrono.

BIB. Santé
Medicine
Paris

QUÆSTIO MEDICO-CHIRURGICA,*

QUOD LIBETARIIS DISPUTATIONIBUS

manè discutienda in Scholis Medicorum, die Martis duodecimâ

Februarii, anno Domini M. DCC. LXXXVIII.

M. STEPHANO POURFOUR-DU-PETIT, Antiquo Facultatis
decano, Doctore Medico, Præside.

Utrum Ani fistula ferro tutius quàm Causticis, aut ligaturâ curetur?

I.

ANUS est extremum inferius intestini recti. Triplici instructus est musculo : horum unus, ab officio, constrictor sive sphincter Ani dicitur : ab inferioribus ossis sacri vertebriis enatus podici circumducitur : ossibus coxendicis per ligamenta membranacea lateraliter alligatur : antè vesicæ urinariæ per fibrosos reclus, in feminis collo uteri per proprios hujus musculos adhærescit. Superiori parte crassus est, tenuior inferiori, quâ cuti inferitur & firmiter connexus est. Dicatur hic unus aut triplex musculus, nihil ad rem. Anum claudit nè feces injussæ excernantur. Reliqui duo musculi levatores Ani appellantur. Originem habent utrinquè à parte internâ & laterali ossis ischii, & quandoquè pubis, desinunt in Ani sphincterem. Il musculus constrictorem, qui ad inferiora plus minùsve detruditur, prout majori vel minori conatu egeruntur excrementa, fursùm retrahunt in locum pristinum. Arterias & venas ab Iliacis internis habet podex, quæ ob id hæmorroïdales audiunt, quòd non rarò per Anum cruor effluat. Qui in venis hæmorroïdalibus continetur sanguis, facillè lentescit, spissescit, corrumpitur. Plures inter alias causas, compressionem cogitabis, tum ab induratis fecibus, tum ob sessionem aut equitationem diuturniorem. His annumera casum, idus quæ supervenit contusio. Anus igitur tumoribus & abscessibus valdè obnoxius cognoscitur. At aliquandò dysenteria, tenesmus, alvi fluxus diù permanentes aut præposterè suppressi, sæpissimè hæmorroïdes cæcæ, dolentes, non ritè fluentes, aut legitime fluentes perperam siccatae, abscessus generant, horum soboles fistula. Id nomen est ulceri alto, angusto, calloso, pus fundenti, copiosum si ex pluribus partibus deducatur; album, leve, si musculos tantum perferat : *At ex nervoso loco coloris quidem ejusdem, sed tenuius & minus : ex nervo, pingue & oleo non dissimile.*

Chf. L. v.
C. xviij.

(*) Propugnata anno 1736. Præside M. Henrico Guxot.

A

I I.

ANI fistulæ, sede, facie, formâ, indole, inter se differunt. Intestinum rectum aliquandò ejusque musculos afficiunt, atque ultra trium digitorum altitudinem perreptant. Alias in margine podicis consistunt. Alias ab intestino fecedunt usque ad os sacrum, coxas, femora, vesicam ipsamque penis radicem spatiatæ, gyros revolvunt. Simplices modò, modò plures observantur cuniculi. Triplex ergò fistulæ Ani species. Nunc foris impervia intestinum perforat. Nunc margine podicis perforatâ integrum remanet intestinum. Nunc intus hiat & forinsecus. Fistula intestinum duntaxat perforans, externo expers ostio his signis innotescit: partes finitimæ tumescunt, inflammantur, dolent, indurescunt, pulsatione exercentur, quandoque dysuria vel stranguria præit; dein suppuratione peractâ, feces pure aspersæ egeruntur, pruritus in sphinctere Ani molestus est, tandem aliquid asperi, digito in intestinum immisso, perferuntur. Fistula foris & internè hians non solum puri sed & flatibus exitum præbet. Fistula externè aperta, internè verò occlusa specilli ope distinguitur, specillum enim certior fistulæ sedis indagator. Specillum in fistulam, digitus oleo illitus in Anum immittuntur, ut altitudo fistulæ, ejus incessus, hiatus explorentur. Hâc viâ fistulam secundum intestinum irrepere ipsumque perforare, vel ab ipso recedere ac vagari; simplicem esse aut cuniculos agere faciliè deprehenditur. Quâ sit ut prognosis & curatio variâ instituenda sit. Veterem fistulam liberè pus emittentem, parùm asferentem incommodi, valetudini non adversari, quin etiam conducere experientiâ discitum est. Si aliùs excurrat fistula, vesicam, ischion, os sacrum pertingat, aut medios Ani musculos transgrediatur, cura, quam vulgò *palliativam* vocant, adhibenda. Quid ita? invita alvi dejectio succederet, sinibus profundioribus, cariei ossium mederi nequicquàm posses. Tunc universalibus præsiidiis in usum vocatis, ægrum Naturæ committere juvat. Cæterarum podicis fistularum curationem aggredieris? hanc perficies ferro tutius quàm causticis aut ligaturâ.

I I I.

IN hoc tota posita est Ani fistulæ curandæ ratio, ne plus minùsve quàm par est illa aperiatur, ne partes sanæ frustra discerpantur, aut ulcerosæ & callosæ intactæ remaneant. Quidni huic aperturæ faciendæ *escharotica* usurpentur? vehementioribus enim aut mitioribus adhibitis, major minorve procreatur *eschara*. Egregium consilium! sed experientiæ & rationi absonum. Quis caustici *energiam* adeò noverit, ut ejus effectus suo arbitrio componere valeat? Cordatus Medicus validiora aut mitiora æqualitèr exhorrescit: ut hæc muneri proposito imparia, illa nimis corrosionis capacia. Causticum *exlex* & effrenum nullis regulis subicitur. Hujus effectus si immodicus, vix ac ne vix quidem coercetur. In variis subjectis partes plus minus duræ, magis minùsve resistunt. Hinc de medicamenti naturâ, indole, dosi, nihil certi habetur. Num *escharotica* sero dissoluta atque ultra citràque diffusa, absumendis duntaxat partibus insidebunt? quot & quàm necessariò partes insontes adurentur! At quanto cum dolore! videas homines miserrimos diem integrum, imò diutius immanissimè cruciari, jactari, ejulare. Nequè tamèn forsan adeò reformidanda est strages illa partium innocuarum, quàm timendum est ab iis, quæ dolores invehunt, symptomatibus. Dolor immanis vigilias, vigilie febres, febris

phlegmonas, phlegmones convulsionem pariunt, convulsionem non raro mors excipit. Aliundè quòque causticorum pericula. Lethalia sunt à telis venenatis, inflata vulnera. Animalia quorum in vulneribus oleum Tabaci aliudve toxicum instillatum fuerit enecantur. Non-ne spiritiosa, emollientia, narcotica externè admota vires suas exerunt? Cicuta diutius suprà regionem cordis gestata, *syncopen* atque *cardialgiam* intulisse narratur ab Authoribus gravissimis. Quorsùm hæc? ut intelligas caustica ad apperendam fistulam applicata suis tetrìs *miasmatis* totam corporis œconomiam posse pervertere. Sed ad callum absumendum quàm ineptè caustica usurpantur! Quis nescit causticum etiàm parti sanæ applicatum *escharam* facere? sed si parti callosæ? decidet *eschara* quidem, at subiectis partibus remanebit durities. Huic assumentæ novum applicatur causticum: exindè novus callus eodem semper modo tollendus & renovandus. Hinc in annos non raro torquentur ægri cruciatibus teterrimis, qui causticorum actionem expertes pænè doloris passuros se putaverant. Quid de carunculis fungosis queis ortum præbent etiàm caustica? Quis verò nescit partes breviori temporis spatio, longèque minori dolore incidi, quàm aduri? ferrum oculus dirigit nè longiùs quàm par est vagetur, nè quid labefactatum relinquat intactum.

I V.

INCISIONEM perpeffurus variis præparationibus indiget, *phlebotomiâ*, catharticis, diætâ convenienti; alterantibus, si opus est, utatur. Paulò antè operationem alyus enemate solvenda & urina emittenda. Faciliùs operaberis, secum & urinæ ejectionem prohibebis. Tùm æger pronus ledi spondæ decumbat. Clunes porrigat à famulis diducendas. Brachia, tibix, femora, truncus immota teneantur. In Anum ægri sic compositi, indicem oleo illitum Chirurgus immittit, specillum in fistulam foris hiantem inserit, specillo intestinum paulò supra hiatum fistulæ perforat, specillum index in ansæ modum infleat. Comprehensa specillo tota fistula, foràs lenitèr, nè partes dilacerentur, adducta scalpello incurvo circulariter abscinditur. Cæcam intrinsecus fistulam completam efficiat intestinum specillo perfodens Chirurgus. Hanc attrahat & excidat. Quò pertingat forinsecus fistula quæ tantum perforat intestinum, declarat vulgò tumor externus, durus, saltèm exiguus; hic aperiendus. Sic patefactâ, quæ specillum admittat, viâ; modum tenes operandi qui superius traditus est. Incisione peractâ, cuniculi, si qui sint, aperiuntur, calli amputentur, rescentur habenulæ. Cavendum maximè nè furculus arteriosus, qui pulsatione facilè distinguitur, pro habenulâ incidatur. Crassior turunda oleo & ovi vitello simul mixtis imbuta in Anum immittatur; pluribus linamentis eodem liquore tinctis vulnus implendum, superposito splenio emplastro obducto, additis linteolis complicatis. Hæc ut firmentur, deligatione indigent. Deligandi modum accipe. Antequàm abscindatur fistula, mantile secundum longitudinem ter quaterve plicatum renes ægri cingat. Cingulum istud, linteò ab ægrotantis collo antè & retrò pendenti (*scapulare* vocant) utrimque assuatur. Mantili verò renes cingenti adhæreat à tergo fascia sex digitos lata, duos cubitos circiter longa. Hæc apparatus vulneri applicatum comprehendens ad scrotum usquè adducatur integra: quod reliquum est bifidum esse debet, ut intra crura excurrens, cum renum cingulo, de quo dictum est, antorsum firmiter, connectatur. Post diem integrum primus solvitur apparatus.

Turunda & linimenta balsamo *Arcei* & unguento *Basilico*, aut similibus Pharmacis deinceps oblinantur. Pure albo nec grave olente existente, renatisque, quantum demptum est, genuinæ indolis carnibus, cicatrix unguenti pompholygos ope inducatur. Vulnus eò citius sanatum iri existimes, quò diàtā tenuiori toto curationis spatio usus fuerit ægrotans.

V.

AGE nunc. Quid verearis ab excisione fistulæ? num hæmorrhagiam? at nulla est sæpissimè; si quæ tamen, facile compescitur. Cum amputatur mamma, plures simul secantur arteriæ: Num ab hac operatione deterret hæmorrhagiæ metus? linamento solo sistitur fluxus sanguinis. Nequè eodem periculo, si quod imminet, vacat causticorum usus. *Eschàra* quidem ab iis inducta omnes vasorum hiatus occludit; eàdem decedente nonnè rursus dehiscunt vasa? hinc obsolevit ferro candenti sanguinem cohibendi consuetudo. At saltèm, inquit causticorum Patroni, ostium fistulæ cum forinsecus non satis patefcit, leviori caustico ampliandum est. Quidni ferro potius? si ferrum adeò reformidet æger, spongia præparata in fistulam immissa, imbibito succo tumefacta paulatim ostium fistulæ dilatat. Verùm cum majori dolore & tædio. Potior est dolor acutus qui brevi pungat, quàm levis qui diù molestus sit. Quarè non audiendi sunt qui fistulam filo serico, vel setà equinā vincendam & de die in diem constringendam donec secetur, prædicant. Isthæc operatio eò crudelior quò longior; insuper nec expers est periculi. Si filo secantur vasa sanginea, à constrictione supersedeas oportet, & hæmorrhagiæ occurras. Quod si hoc non eveniat incommodi, doloremque ferat æger constanter, improbanda tamen illa: ad curationem enim fistulæ, non ipsa tantum sed cuniculi, si qui sint, aperiendi, habenulæ & callosa substantia excidenda. Hæc vinculis illis nullo modo, causticis difficultèr admodum, ferro facillimè perfcies.

Ergò Ani fistula ferro tutius quàm causticis aut ligaturâ curatur.

DOMINI DOCTORES DISPUTATURI.

- | | | |
|---|--|---|
| <i>M. Franciscus - Gaspardus DIDERON.</i> | <i>M. Carolus - Jacobus - Ludovicus COQUEREAU, Serenissimi Condæi Principis Medicus ordinarius, nec non Regis apud peditatum tum gallicum tum extraneum, Consultarius Medicus.</i> | <i>M. Joan. Bapt. - Eugenia DUMANGIN.</i> |
| <i>M. Philibertus BORTE.</i> | <i>M. Franciscus - Maria LE MOINE.</i> | <i>M. Thomas LE VACHER DE LA FEUTRIE, Antiquus Facultatis Decanus, utriusque Pharmacie Professor.</i> |
| <i>M. Josephus - Ignatius GUILLOTIN.</i> | <i>M. Joannes - Augustinus COUTAVOZ, anatomæ & rei obstetriciæ Professor designatus.</i> | <i>M. Joannes COLOMBIER, Civilium tum nosocomiorum, tum Custodiarum Inspector.</i> |

Proponebat Parisiis MARIA-ANTONIUS PETIT, Suesfionæus, Saluberrimæ Facultatis Medicinæ Parisiensis Baccalaureus. A. R. S. H. 1788.

AB OCTAVA AD MERIDIEM.

Typis **QUILLAU**, Universitatis & Facultatis Medicinæ Typographi. 1788.

